

# Najib arah selesai isu di Abu Dhabi

Gerak kerja sulit elak negara diseret ke Mahkamah Timbang Tara Antarabangsa: Amhari Afendi

Oleh Ahmad Johari Mohd Ali, Siti Nurazlinee Azmi dan Farah Marshita Abdul Patah  
bhnews@bh.com.my

**Kuala Lumpur:** Datuk Seri Najib Razak mengarahkan pegawai khususnya ke Abu Dhabi bagi menyelesaikan permasalahan untuk mengelakkan negara diseret ke Mahkamah Timbang Tara Antarabangsa kerana Malaysia Development Berhad (IMDB) gagal membayar bon hutang yang dijamin International Petroleum Investment Company (IPIC).

Najib meminta Pegawai Khasnya, Datuk Amhari Afendi Nazarrudin, mengesahkan dengan pihak Abu Dhabi bahawa kedua-dua negara bersetuju untuk menyelesaikan pertikaian itu tanpa perlu merujuk ke Mahkamah Timbang Tara Antarabangsa.

Amhari Afendi yang juga saksi pendakwaan kelapan, berkata ia

adalah satu gerak kerja sulit yang diarahkan Najib kepadanya kerana pada ketika itu isu hutang IMDB dengan IPIC hangat diperkatakan.

Katanya, 'perjanjian penyelesaian' yang dibincangkan itu adalah membabitkan perjanjian antara dua negara berikutan proses timbang tara antarabangsa yang dijangka diadakan pada masa terdekat tidak berlaku.

"IPIC dan IMDB akhirnya berjaya menandatangani perjanjian penyelesaian pada pertengahan 2017," katanya ketika membacakan pernyataan saksi pada prosiding yang memasuki hari keempat.

Amhari Afendi berkata, sebelum itu beliau mendapat tahu bahawa terdapat perjanjian *Binding Term Sheet* (BTS) yang sudah ditandatangani antara kedua-dua pihak.

Beliau berkata, apabila perjanjian BTS gagal dipatuhi (oleh IMDB), pihak IPIC hendak membawa pertikaian itu ke Mahkamah Timbang Tara Antarabangsa.

Katanya, berikutan itu Jho Low merancang satu lagi perjanjian iaitu 'perjanjian penyelesaian' bagi mengelakkan Malaysia disaman di mahkamah berkenaan.

"Selepas mengadakan pertemuan dengan Datuk Seri Najib dan setibanya di rumah, saya mendapat pesanan ringkas BlackBerry (BBM) daripada Jho Low yang memberitahu saya perlu ke Abu

Dhabi untuk bertemu Khaldoon Khalifa Al Mubarak.

"Khaldoon adalah Ketua Pegawai Eksekutif (CEO) Mubadala Development, Emieriah Arab Bersatu (UAE)... Jho Low juga beritahu, beliau akan e-mel draf perbincangan bersama Khaldoon pada masa terdekat.

"Najib dan Jho Low tahu masalah bayaran hutang IPIC dan secara tidak langsung mereka terbabit dalam rundingan antara saya dan Khaldoon. ...sekarang ini baru saya faham bahawa tindakan itu adalah sebagai langkah *damage control*," katanya.

Amhari Afendi yang pergi ke Abu Dhabi seorang diri dan berjumpa Khaldoon di pejabat Mubadala, berkata sebelum ini CEO itu dijanjikan 'macam-macam' oleh Malaysia tetapi tidak dilaksanakan.

Pada awalnya Amhari Afendi berkata, beliau tidak memahami apa dimaksudkan dengan 'bermacam-macam' janji tetapi mendapat tahu ia merujuk kepada perjanjian BTS yang tidak dipatuhi sepenuhnya.

Amhari Afendi berkata, pertemuan itu diadakan di pejabat Khaldoon di mana mereka berdua membincangkan mengenai perkara berbangkit itu.

"Hasil daripada perbincangan itu, kami bersetuju bahawa Khaldoon dan saya akan menjadi pemudahcara untuk dua negara secara *back channel* (saluran belat-



Amhari Afendi ketika hadir di Mahkamah Tinggi Kuala Lumpur, semalam.  
[Foto ASwadi Alias/BH]

kang) untuk tidak ke Mahkamah Timbang Tara Antarabangsa jika perjanjian dapat dipersetujui dan Malaysia membuat bayaran seterusnya (*next payment*).

"Ia adalah satu tugas khas yang sulit dan saya perlu buat sendiri atas arahan Najib dan Jho Low," katanya.

Saksi itu berkata, perbincangan perjanjian untuk keluar daripada proses timbang tara akan diuruskan oleh IMDB dengan IPIC serta peguam masing-masing, bagaimanapun Jho Low sentiasa memberi rumusan dan cadangan penyele-

saian dua pihak secara keseluruhannya.

Menurut saksi itu lagi, beliau kemudian dihubungi Khaldoon dan peguam IPIC, Martin Edelman bagi penjelasan lanjut berhubung kedudukan perjanjian yang gagal dicapai pada hujung 2016 kerana dua negara itu tidak bersetuju dengan beberapa klausa.

Beliau berkata, pada tempoh akhir perjanjian yang perlu ditandatangani, Najib menelefonnya beberapa kali untuk memintanya merumuskan perbincangan terkini antara kedua-dua pihak.